



# **LIPOTI MO LE FONO AOAQ FAITULAFONO**

**“Tulafono Tau Faaofi o Teuteuga o le Faavae  
(Nu. 2) 2015”**

**Komiti o Oloa Gaosia Tulaga Muamua, Mataupu Tau Pisinisi,  
Alamanuia ma Leipa**

**(Tuuina atu i le Fono Aoaq Faitulafono)**

## 1. FAUTUAGA:-

E fautuaina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa ia le Fono Aoao Faitulafono ina ia faautagia lana Lipoti.

## 2. TULAFONO TAU FAAOFI NA ILOILOINA:-

*(Tuuina atu 30/06/2015)*

**Tulafono Tau Faaofi o Teuteuga o le Faavae (Nu. 2) 2015.**

Na iloiloina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa <sup>1</sup> le Tulafono Tau Faaofi o Teuteuga o le Faavae (Nu. 2) 2015 (TTF) e tusa ai ma le Faatonuga na tuuina mai e le Fono Aoao Faitulafono i le aso 30 o Iuni 2015.

## 3. TAUALUMAGA:-

Na valaauina e le Komiti le mamalu o le atunuu e ala i se faasalalauga faalauaitetele i luga o le Televise (S.Q.B. TV 1) ma le leitio faasalalau a le Faalapotopotoga o Faasalalauga (2AP), mo ni finagalo faaalua po o ni finagalo tusitusia e faatatau i lenei TTF. I taualumaga o Iloiloga a le Komiti sa fofogaina ai molimau tuufofoga faatasi ma molimau tusitusia sa mafai ona tuuina mai i luma o le Komiti. <sup>2</sup>

Na tapā e le Komiti le fesoasoani a i latou nei a o faagasolo ana iloiloga.

### FESOASOANI (T. T. 156)

#### Ofisa o le Loia Sili:

Tuatagaloa Aumua Ming Leung Wai	-	Loia Sili
Loretta Teueli	-	Loia Tusi Tulafono Autu
Rupeni Nawaqakuta	-	Loia Faufautua Tusi Tulafono
Kylie Wilson	-	Loia Ofisa

<sup>1</sup> E tusa ai ma aiaiga o le **Tulafono Tumau 174** o le a avea ma tiute o le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa le:-

- (a). Iloiloina o so o se tulafono tau faaofi, talosaga po o so o se isi mataupu ua tuuina atu e le Fono Aoao po o e tusa ai ma Tulafono Tumau; ma Tala Faatatau o Tupe po o le toe iloiloina o le faatinoina o galuega a matagaluega e pei ona tuuina atu i ai e le Komiti o Tupe Maua ma Tupe Totogi;
- (b). Suesueina o faiga faavae, pulega ma tupe alu a matagaluega ma faalapotopotoga a le malo po o nisi faalapotopotoga e fesootai oloa gaosia tulaga muamua, mataupu tau pisinisi, alamanuia, leipa ma tagata tafafao maimoa.

<sup>2</sup> Silasila i le Vaega 7 - Molimau.

**Matagaluega o Faamasinoga ma le Faafoeina o Tulaga Tau Faamasinoga:**

Masinalupe Tusipa Masinalupe - Ofisa Sili o Pulega  
Li'o Heinrich Siemsen - Ofisa Sili Lagolago

**Matagaluega o Leoleo ma Falepuipui:**

Egon L Keil - Ofisa Sili o Pulega  
Fetogi R. Vaai - Faufautua Faaletulafono  
Leulua'ialii Malama Fauo'o - Faauluuluga o le Vaega o Moliaga  
Tau Soligatulafono

**Ofisa o le Fono Aoaofaitulafono:**

Teleiai Dr. Lalotoa S. Mulitalo - Loia Faufautua a le Palemene

**4. SAILIILIGA:-**

O lenei TTF ua teuteuina ai le Faavae o le Malo Tutoatasi o Samoa 1960 ('Faavae') ina ia faavae ai le tulaga tofi o se Faatonu e Faafoeina Moliaga Faaletulafono a le Atunuu ('Faatonu'), ma aiaia ai ana galuega tauave ma malosia e faatuina ai, taitai po o le faagataina o so o se taulumaga mo se soligatulafono e faapea ua uma ona faia.

Na faamauina e le Komiti, o lenei TTF ua tuuina mai faatasi ma le Tulafono Tau Faaofi o le Ofisa Tutotonu e Faafoeina Moliaga Faaletulafono 2015, ua faamoemoe mo le faavaeina ai o le tofi o le Ofisa Tutotonu mo le faafoeina o moliaga faaletulafono i totonu o le atunuu. O sea Tofiga e tutusa lava ma Tofiga o le Faatonu e Faafoeina Moliaga Faaletulafono a isi foi Atunuu o le Taupulega. E pei foi ona atagia ai i totonu o lenei TTF, o sea Tofiga e tutoatasi mai le Pulega Faatonu o le Malo, i le tulaga e faapea, e latou te lē galulue i luga o so o se faatonuga e faatino ai a latou galuega.

Matauina e le Komiti, e fa (4) aiaiga autu o lo o faatulai mai e le TTF mo le teuteuina o le Faavae, e aofia ai le:

1. Teuteuina o le Mataupu 41 (2) o le Faavae ina ia aveesea mai ai matafaioi ma tiute tauave o le faafoeina o moliaga faaletulafono mai le Loia Sili;
2. Faaofiina o le Mataupu 41A fou mo le faavaeina o le Tofiga o le Faatonu;
3. Faaofiina o le parakarafa fou (ga) i le Mataupu 83 ina ia leai se aafiaga o le Faatonu ma le Ofisa Tutotonu e faafoeina moliaga faaletulafono i lalo o auaunaga ma tofiga e aiaia e le Komisi o Galuega a le Malo.

#### 4. Faatulagaina o aiaiga tau soloaiga ma aiaiga faasaoina.

O le aveesea mai ai o matafaioi ma tiute tauave o le faafoeina o moliaga faaletulafono mai le Loia Sili, o le a fesoasoani lea i le Loia Sili i le tuuina atu o le faatulagaga manino o galuega o lo o ia faatinoina ma faamautinoa ai e faapea o le a lē aafia ai i so o se itu o matafaioi ma tiute e faia ai moliaga faaletulafono i le Pulega Faatonu o le Malo.

I le silasila a le Komiti, o se laasaga taua tele ua agai iai le faigamalo o le atunuu e le gata i le uunaia ma le faamautuina o pulega Malo lelei ae faapea foi i le tulaga o le fesoasoani tele e tuuina atu i ona tagatanuu. E le gata i lea, ae o le faavaeina ai o sea tofiga i lona tulaga tutoatasi o le a fesoasoani foi i le faamasinoga i le faatinoina o ana faaiuga fai aemaise le iloiloina o soligatulafono ua uma ona fai o le a tuuina atu i luma o le faamasinoga.

I le faagasologa o iloiloga a le Komiti i lenei TTF, sa faamauina ai nisi o atugaluga sa mafai ona tuuina mai i luma o le Komiti e teena ai le teuteuina o le Faavae e pei ona aiaia e le TTF. Sa iloilo ma le totoa e le Komiti ia atugaluga i ona vaega uma ma e lei mafai ona faamalieina le Komiti i manatu ma mafuaaga e lagolagoina ai le mau tetee sa tuuina mai, aua o lo o manino ma malamalama le agaga moni o lenei TTF, i lona afuuga aemaise lona sootaga i le Faavae. Peitai, o ia atugaluga uma na atagia ai le leai o se faatalatalanoaga o lenei TTF i lona laasaga amata, e pei foi ona faailoaina e nisi o molimau. E manatu le Komiti, o ia tulaga uma e ao lava ona faatino aua e le gata o aiaiga ma taiala i laasaga o le tusia ai o so o se tulafono ae faapea foi i le tāua o le sao o so o se tagata o lo o aafia i so o se tulafono tau faaofi o le a tusiaina.

#### 5. ILOILOGA AUILIILI O LE TULAFONO TAU FAAOFI:-

I le iloiloina auiliili o lenei TTF ua faamalieina le Komiti ma o lo o talafeagai aiaiga uma ua faatulaga mai.

#### 6. IUGAFONO:-

I le maea ai o iloiloga a le Komiti na faaiugafonoina ai e fautuaina le Fono Aoao, Ina ia faagasolo le Tulafono Tau Faaofi o Teuteuga o le Faavae (Nu. 2) 2015, e aunoa ma se teuteuga.

#### 7. MOLIMAU:-

I le faagasolo ai o iloiloga a le Komiti i luga o lenei TTF sa fofogaina ai molimau tuufofoga faatasi ai ma molimau tusitusia a i latou nei:

### 7.1 Molimau Tuufofoga

Le Tagaloa Pita	-	Sui o le Atunuu
Savalenoa Mareva Betham Annadale	-	Peresitene ( <i>Sosaiete a Loia Samoa</i> )
Rosella Viane Papalii	-	Sui Peresitene ( <i>Sosaiete a Loia Samoa</i> )

### 7.2 Molimau Tusitusia

Savalenoa Mareva Betham Annadale	-	Peresitene ( <i>Sosaiete a Loia Samoa</i> )
Rosella Viane Papalii	-	Sui Peresitene ( <i>Sosaiete a Loia Samoa</i> )

**8. SAINIA E LE KOMITI.**

Afioga Hon LEAUPEPE Toleafoa Apulu Faafisi.  
**TAITAFONO.**

Afioga MAUALAIVAO Pat Ah Him  
**SUI TAITAFONO**

Afioga AFUALO Wood Uti Salele  
**SUI USUFONO**

Afioga TIALAVEA Fea Tionisio Seigafo  
**SUI USUFONO.**

Afioga Hon AEAU Peniamina Leavaiseeta  
**SUI USUFONO.**

Tofa FAIMALOTOA Kika Stowers  
**SUI USUFONO.**

Tofa AVEAU Tuala Lepale Niko Palamo  
**SUI USUFONO.**